

《無量壽經優婆提舍願生偈》 補充講表

◎附表十二：

○彼無量壽佛國土莊嚴，第一義諦妙境界相（真空妙有）。

※《金剛經講義》云：「蓋真心不但真空，且是真有。真空者，離名絕相故；真有者，常恒不變故。彼一切緣生法不然，本無是物，但現假相而已，乃是真空假有者也。（剋實論之，尚不足言真空，只可謂之假空。因諸法之空，是由假有形成者耳。既非實物，空有俱說不上。茲姑隨順古義，說為真空假有。）因其本空，故說假有。因其假有，故知本空。為欲明其空有是相待相形而成，故曰空有同時耳。不似真心，離名絕相之空，常恒不變之有，皆是絕待。其同時並具，初非由於相待相形而成者也，故謂之真，故能為一切法之體。又復真心既萬古常恒，故曰本不生。若一切法亦名本不生者，乃因假現生相，形成為本來不生耳；實則本無是物，無所謂不生也。」

○莊嚴「清淨」功德成就者，偈言：「觀彼世界相，勝過三界道」故。

※《往生論註》云：「此云何不思議？有凡夫人煩惱成就，亦得生彼淨土。三界繫業，畢竟不牽，則是不斷煩惱，得涅槃分，焉可思議！」

※《彌陀要解》云：「明上住處生處種種莊嚴，皆是阿彌陀佛大願大行稱性功德之所成就。

故能遍嚴四種淨土，普攝十方三世一切凡聖令往生也。復次佛以大願作眾生多善根之因，以大行作眾生多福德之緣。令信願持名者，念念成就如是功德，而皆是已成，非今非當。」

○莊嚴「量」功德成就者，偈言：「究竟如虛空，廣大無邊際」故。以下糅合《往生論註》

◆此云何不思議？彼國人天，若意欲宮殿樓閣，若廣一由旬，若百由旬，若千由旬，千間萬間，隨心所成，人各如此。又十方世界眾生願往生者，若已生，若今生，若當生，一時一日之頃，算數所不能知其多少。而彼世界常若虛空，無迫迮相。彼中眾生，住如此量中，志願廣大，亦如虛空無有限量。彼國土量能成眾生心行量，何可思議！

○莊嚴「性」功德成就者，偈言：「正道大慈悲，出世善根生」故。以下糅合《往生論註》

◆此云何不思議？譬如迦羅求羅蟲，其形微小。若得大風，身如大山，隨風大小，為己身相。生安樂眾生，亦復如是。生彼正道世界，即成就出世善根，入正定聚，亦如彼蟲，非身而身，焉可思議！

※《大智度論》卷七云：「譬如迦羅求羅蟲，其身微細，得風轉大，乃至能吞食一切。」

○莊嚴「形相」功德成就者，偈言：「淨光明滿足，如鏡日月輪」故。以下糅合《往生論註》

◆此云何不思議？夫忍辱得端正，我心影響也。一得生彼，無瞋忍之殊。人天色像，平等妙絕，蓋淨光之力也。彼光非心行，而為心行之事，焉可思議！

○莊嚴「種種事」功德成就者，偈言：「備諸珍寶性，具足妙莊嚴」。以下糅合《往生論註》

◆此云何不思議？彼種種事，或一寶、十寶、百千種寶，隨心稱意，無不具足。若欲令無，倏焉化沒，心得自在，有踰神通。安可思議！

○莊嚴「妙色」功德成就者，偈言：「無垢光焰熾，明淨曜世間」故。以下糅合《往生論註》

◆此云何不思議？其光曜事，則映徹表裏。其光曜心，則終盡無明。光為佛事，焉可思議！

○莊嚴「觸」功德成就：「寶性功德草，柔軟左右旋，觸者生勝樂，過迦旃鄰陀」。

◆此云何不思議？夫寶例堅強，而此柔軟。觸樂應著，而此增道。事同愛作，何可思

議？有菩薩字愛作，形容端正，生人染著。經言：染之者，或生天上，或發菩提心。

※善財童子五十三參中，第二十五參之善知識，名婆須蜜多女，如《華嚴經》云：「若有眾生欲意所纏來詣我所，我為說法，彼聞法已，則離貪欲，得菩薩無著境界三昧。若有眾生暫見於我，則離貪欲，得菩薩歡喜三昧。若有眾生暫與我語，則離貪欲，得菩薩無礙音聲三昧。若有眾生暫執我手，則離貪欲，得菩薩遍往一切佛刹三昧。若有眾生，暫昇我座，則離貪欲，得菩薩解脫光明三昧。若有眾生暫觀於我，則離貪欲，得菩薩寂靜莊嚴三昧。若有眾生見我頻申，則離貪欲，得菩薩摧伏外道三昧。若有眾生見我目瞬，則離貪欲，得菩薩佛境界光明。」